

RIJEČ REDAKCIJE

Ovaj broj *Priloga* u koncepcijskom smislu se ne razlikuje od ranijih izdanja. U prvom tematskom bloku objavljujemo dio saopćenja sa skupa pod naslovom *Sarajevo 1914 – Devedeset godina poslije*, što ga je Institut za istoriju organizirao 28. juna 2004. u Sarajevu. Dio saopćenja nije bio pripremljen za štampu, ali predviđamo da će neki od tih referata biti objavljeni u narednim brojevima našega časopisa.

Cilj nam je bio da u ovome broju krenemo ka postepenom uvođenju kritičkog dijaloga u našoj nauci. U tom smislu smo otvorili stranice za polemike (u ovom broju objavljujemo polemiku bosanskohercegovačkog historičara Mesuda Šadinlije i norveškoga profesora Pål Kolstøa, te odgovor Krešimira Kužića na neke primjedbe koje je u vezi s njegovom knjigom iznio Amir Kliko iz Sarajeva).

Među arhivskom građom objavljujemo tri priloga: jedan o dokumentima koji govore o Bosanskome ejaletu od sredine 16. do početka 18. stoljeća, a čuvaju se u Arhivu u Beču, a bili su u vlasništvu bivše Konzularne akademije; drugi o prepisci u vezi sa vlasništvom Fethija džamije u Zvorniku krajem 19 i početkom 20 stoljeća, te jedan o historijatu Društva arhivski radnika Bosne i Hercegovine).

Prostor smo posvetili i radu Latinke Perović o modernizaciji srpskoga društva, a osobito veliki značaj smo dali prikazima najnovijih knjiga, časopisa, zbornika i naučnih skupova.

Naravno, kritički pristup, kojeg se želimo držati u radu, nikako ne znači da želimo kroz recenzentske postupke cenzurirati pojedine stavove. Želimo njegovati različitost pristupa, te ostaviti autorima da odgovaraju za naučna gledišta i tačnost navoda u svojim radovima. ■